

KARATE SAVEZ BOSNE I HERCEGOVINE
КАРАТЕ САВЕЗ БОСНЕ И ХЕРЦЕГОВИНЕ
KARATE SAVEZ BOSNE I HERCEGOVINE



PRAVILNIK
O RADU REPREZENTACIJA
KARATE SAVEZA BOSNE I HERCEGOVINE

Sarajevo, 24.03.2021. godine

Na osnovu Člana 29. Statuta Karate saveza Bosne i Hercegovine, Upravni odbor Karate saveza BiH, dana 29.03.2021. godine, donio je:

P R A V I L N I K

O RADU REPREZENTACIJA KARATE SAVEZA BOSNE I HERCEGOVINE

Član 1.

Pravilnikom o radu reprezentacija Karate saveza Bosne i Hercegovine (u daljem tekstu Pravilnik): regulišu se pitanja rada karate reprezentacija Bosne i Hercegovine (u daljem tekstu: reprezentacija) svih uzrasta, disciplina i kategorija, selektora-trenera i Sportskog direktora, načina izbora takmičara/takmičarki u reprezentacije, načina finansiranja, međusobnih odnosa, te i druga pitanja koja su od interesa za rad sa reprezentacijama.

Član 2.

Član/članica reprezentacije može biti takmičar/takmičarka državljanin/državljanica Bosne i Hercegovine (u daljem tekstu: BiH), koji/koja postignutim rezultatima, svojom formom, zdravstvenim statusom i sveukupnim radom, odnosom i ponašanjem zaslužuje da reprezentuje državu BiH i njen karate sport.

Član 3.

Izbor, učešće i nastup za reprezentaciju je najveća čast, pravo, dužnost i obaveza svakog takmičara/takmičarke.

Izabrani takmičari/takmičarke, stručno i tehničko vođstvo, zvaničnici Karate saveza Bosne i Hercegovine (u daljem tekstu: Savez) i drugi članovi/članice reprezentacije su dužni da, uz maksimalno zalaganje na takmičarskom planu i u svim drugim aktivnostima vezanim za reprezentaciju, dostojno predstavljaju svoju Državu.

Član 4.

Reprezentativac/reprezentativka-član/članica reprezentacije je dužan/dužna da ispunjava sve obaveze iz plana i programa rada selektora-trenera i plana nastupa reprezentacije u koju je izabran (takmičenja, pripreme, kampovi, seminari, testiranja, predavanja, okupljanja i dr.), u protivnom podliježe disciplinskoj odgovornosti, u skladu sa odgovarajućim normativnim aktima Saveza.

Opremu, oznake i simbole reprezentacije izabrani reprezentativac/reprezentativka je dužan/dužna da nosi na svim reprezentativnim okupljanjima, aktivnostima i nastupima za reprezentaciju, dok mu/joj to u drugim prilikama nije dozvoljeno.

Član 5.

Pod nastupom za reprezentaciju podrazumijevaju se nastupi u sastavu reprezentacije na svim međunarodnim službenim takmičenjima, u skladu sa međunarodnim sistemom i programom takmičenja Svjetske karate federacije (u daljem tekstu: WKF): Balkanskim prvenstvima, Mediteranskim prvenstvima i Mediteranskim igrama, na Evropskim prvenstvima i Evropskim igrama, Svjetskim prvenstvima i Svjetskim igrama, na Olimpijskim igrama i mogućim drugim službenim takmičenjima iz sistema takmičenja WKF, čime takmičari/takmičarke stiču status reprezentativca/reprezentativke BiH.

Osim na navedenim službenim takmičenjima, takmičari/takmičarke mogu nastupati za reprezentaciju na nezvaničnim takmičenjima: kontrolnim takmičenjima, turnirima, regionalnim, prijateljskim, memorijalnim, revijalnim, i drugim nezvaničnim takmičenjima, čime ne stiču status reprezentativca/reprezentativke BiH. Status reprezentativca/reprezentativke takmičar/takmičarka zadržava do sljedećeg nastupa reprezentacije, a onda ga ili zadržava ili gubi, u zavisnosti od toga da li nastupa za reprezentaciju ili ne.

Reprezentacije mogu imati selekciju za borbe i za kata takmičenje. Takmičar/takmičarka može nastupati u selekciji za borbe i za kate, pojedinačno i ekipno.

Starosne kategorije su definisane Takmičarskim pravilnikom Karate saveza BiH (u daljem tekstu: Takmičarski pravilnik), odnosno pravilnicima Karate federacije Balkana (u daljem tekstu: KFB) i WKF.

Član 6.

Savez, u cilju nastupa na međunarodnim takmičenjima, formira reprezentacije u skladu sa pravilima i zahtjevima KFB i WKF.

Član 7.

Svaka reprezentacija ima: takmičare/takmičarke i selektora-trenera. Osim ovih lica, za rad sa reprezentacijom mogu se angažovati i druga stručna lica (treneri za određenu oblast, ljekari, psiholozi, fizijatri, i dr.), na prijedlog selektora-trenera, Selektorske komisije i Sportskog direktora, a po odobrenju Upravnog odbora (u daljem tekstu: UO) Saveza.

Član 8.

Selektore-trenere reprezentacija, nakon provedenog konkursa, na prijedlog Sportskog direktora, imenuje UO Saveza. Imenovanja se vrše na period od četiri godine, sa mogućnošću reizbora. Uslove konkursa utvrđuje UO Saveza posebnom odlukom, a u skladu sa odredbama Zakona o sportu u BiH i Statuta Saveza.

Upravni odbor imenuje selektore-trenere za sljedeće reprezentacije:

1. Seniorska muška reprezentacija - borbe,
2. Seniorska ženska reprezentacija - borbe,
3. U21 muška reprezentacija - borbe,
4. U21 ženska reprezentacija - borbe,
5. Juniorska muška reprezentacija - borbe,
6. Juniorska ženska reprezentacija - borbe,
7. Kadetska muška reprezentacija - borbe,
8. Kadetska ženska reprezentacija - borbe,
9. Dječija muška reprezentacija - borbe,
10. Dječija ženska reprezentacija - borbe,
11. Seniorska muška reprezentacija i U21 muška reprezentacija - kate,
12. Seniorska ženska reprezentacija i U21 ženska reprezentacija - kate,
13. Juniorska i kadetska muška reprezentacija - kate,
14. Juniorska i kadetska ženska reprezentacija - kate i
15. Dječija muška i ženska reprezentacija - kate.

Izuzetno, ukoliko se i na ponovljeni konkurs ne javi dovoljno zainteresovanih ili stručnih kandidata, UO može odlučiti da, na prijedlog Sportskog direktora, neko od postojećih selektora-trenera, uz njegovu prethodnu saglasnost, zaduži za vođenje više

reprezentacija. Ovako imenovano lice ima status vršioca dužnosti selektora-trenera te reprezentacije. Konkurs za upražnjeno mjesto se, po redovnoj proceduri za izbor i imenovanje selektora-trenera, mora ponavljati svakih šest mjeseci, do izbora drugog kandidata na mjesto selektora-trenera.

Izborom za selektora-trenera reprezentacija, izabrana lica ne zasnivaju radni odnos sa Savezom, ali sa Savezom potpisuju Ugovor o međusobnim pravima, obavezama i odgovornostima, dok Sportski direktor zasniva radni odnos ili Ugovor o djelu, u skladu sa Zakonom i Pravilnikom o sistematizaciji radnih mjesta u Savezu.

Član 9.

Selektor-trener je dužan da odmah, a najkasnije za 15 dana nakon izbora, u formi prijedloga sačini detaljan jednogodišnji plan i program rada sa reprezentacijom za tekuću kalendarsku godinu i program rada sa reprezentacijom za naredni četvorogodišnji period (olimpijski ciklus), najkasnije za 30 dana i iste dostavi Sportskom direktoru na razmatranje i UO na razmatranje i usvajanje.

Navedeni jednogodišnji plan i program rada selektor-trener ubuduće sačinjava i dostavlja Sportskom direktoru na razmatranje i UO na razmatranje i usvajanje svake tekuće godine za narednu kalendarsku godinu, do kraja imenovanja na mjesto selektora-trenera, u roku od 15 dana od dana usvajanja i dostavljanja Kalendara aktivnosti Saveza (u daljem tekstu: Kalendar).

Jednogodišnji plan i program rada sa reprezentacijom sadrži sve aktivnosti i djelatnosti koje selektor-trener ima namjeru da preduzme u cilju obuke i pripreme članova svoje selekcije za ostvarenje vrhunskih sportskih rezultata u određenoj godini, gdje je za sve aktivnosti i djelatnosti obavezano navesti: naziv aktivnosti, termin, mjesto, objekat, organizator i tehnički organizator, prevoz, smještaj, kotizacija, stručni tim, predavači, sudije, vođa puta, zvaničnici Saveza, ciljana grupa, spisak učesnika, cilj aktivnosti i djelatnosti, stručni program, materijalno-tehnička sredstva, oprema i rekviziti, finansijski plan (troškovnik), planirani i ostvareni rezultat, ocjenu uspješnosti, teže povrede i prekršaje i sve drugo neophodno i bitno za informativnost i ostvarivost plana i programa i zacrtanih ciljeva.

Četvorogodišnji program rada sa reprezentacijom sadrži po godinama sve aktivnosti i djelatnosti koje selektor-trener ima namjeru da preduzme u cilju obuke i pripreme članova svoje reprezentacije za ostvarenje vrhunskih sportskih rezultata.

Plan i program rada sa reprezentacijom mora biti usaglašen sa Kalendarom Saveza.

U izuzetnim slučajevima, uz prethodni dogovor sa Sportskim direktorom i uz saglasnost UO, usvojeni plan i program se može izmijeniti.

Član 10.

Selektor-trener je obavezan da neposredno rukovodi pripremama i nastupom reprezentacije. U sklopu svojih obaveza selektor-trener je dužan naročito da:

- Sačini plan i program rada za tekuću i svaku narednu takmičarsku godinu, te program rada za četvorogodišnji period (olimpijski ciklus),
- Realizuje odobreni plan i program rada reprezentacije, u saradnji sa Sportskim direktorom,
- Sačini detaljne planove i programe rada reprezentativaca/reprezentativki za pripreme,
- Ukoliko postoji potreba, u saradnji sa trenerima iz matičnih klubova, za izabrane reprezentativce/reprezentativke izrađuje poseban plan i program rada, u cilju obuke, poboljšanja forme i otklanjanja uočenih nedostaka,

- Prati rad i rezultate reprezentativaca/reprezentativki u toku godine, te vrši korekcije programa njihovog rada,
-
- Vršiti izbor takmičara-takmičarki u širi sastav reprezentacije, na osnovu Kriterija za izbor takmičara/takmičarki u reprezentacije i lične procjene,
- Na osnovu Kriterija za izbor takmičara/takmičarki u reprezentacije, postignutih rezultata, ispoljene forme na pripremama i kontrolnim takmičenjima, zdravstvenog statusa, ukupnog odnosa, zalaganja, ponašanja i drugih uslova, vrši izbor reprezentativaca/reprezentativki za nastup na službenim međunarodnim i drugim takmičenjima reprezentacije,
- Vodi treninge reprezentativcima/reprezentativkama u toku priprema,
- Vodi članove/članice svoje reprezentacije na službenim međunarodnim takmičenjima u svim pojedinačnim i ekipnim mečevima, a ukoliko je ili će biti spriječen, u dogovoru sa Sportskim direktorom, predlaže UO zamjenu iz reda selektora-trenera, koja može, ukoliko posjeduje zvaničnu akreditaciju, preuzeti vođenje reprezentacije, isključivo uz saglasnost UO.
- Predlaže Sportskom direktoru i Upravnom odboru druga stručna lica za rad sa reprezentacijom,
- Predlaže preduzimanje disciplinskih mjera protiv članova/članica reprezentacije,
- Nakon svakog okupljanja reprezentacije (pripreme, takmičenje i dr.) Sportskom direktoru i UO podnosi izvještaj o radu i postignutim rezultatima,
- Obavlja i druge poslove u vezi stručnog rada sa reprezentacijom.

Član 11.

- Selektor-trener i druga stručna lica imaju pravo na putne troškove i naknadu za stručni rad,
- Isplatu, uz mišljenje Sportskog direktora, odobrava UO. Isplata se vrši u skladu sa normativnim aktima Saveza i odlukama UO,
- Selektor-trener nije ovlašten da bez saglasnosti UO preuzima bilo kakve finansijske obaveze u radu sa reprezentacijom.

Član 12.

Selektor-trener je za svoj rad odgovoran UO Saveza.

Član 13.

Sportski direktor organizuje, koordinira, prati i vrši nadzor nad stručnim radom i stručnim školovanjem i usavršavanjem, a naročito:

- Organizuje, koordinira, prati i vrši nadzor nad radom reprezentacija KS BiH,
- Predlaže Upravnom odboru Saveza selektore-trenere za uzrasne kategorije i discipline za njihovo imenovanje i razrješenje,
- Koordinira radom stručnih komisija Saveza i prati realizaciju njihovih planova i programa,
- Stara se o izradi jednogodišnjih i četvorogodišnjih (olimpijski ciklus) planova i programa rada selektora-trenera i o njihovoj realizaciji,
- Na osnovu usvojenih planova i programa rada reprezentacija sačinjava svoj plan i program rada,
- Stara se o izradi planova i njihovoj realizaciji u procesu organizovanja stručnog

- usavršavanja karate stručnjaka u okviru Saveza,
- Osigurava uslove za nesmetano provođenje planova i programa selektora-trenera,
 - Prati realizaciju planova i programa rada kandidata za međunarodna takmičenja,
 - Na prijedlog selektora-trenera daje svoje mišljenje o širem i konačnom spisku reprezentacija za nastup na međunarodnim takmičenjima,
 - Prati organizaciju kampa za mlade perspektivne sportiste,
 - Organizuje i prati provođenje takmičenja iz Kalendara aktivnosti Saveza,
 - Neposredno rukovodi organizacionim poslovima reprezentacije,
 - U saradnji sa kancelarijom Saveza organizuje putovanja reprezentacije,
 - U dogovoru sa selektorima-trenerima predlaže učešće reprezentacije na prijateljskim i revijalnim takmičenjima u zemlji i inostranstvu,
 - Na prijedlog selektora-trenera koordiniše mjesto održavanja priprema,
 - Ukoliko se time stvaraju finansijske obaveze, daje svoje mišljenje UO Saveza, koji donosi odluku o prijedlogu selektora-trenera za angažovanje drugih stručnih lica za pomoć u radu sa reprezentacijama,
 - Na prijedlog selektora-trenera daje svoje mišljenje o preduzimanju disciplinskih mjera prema reprezentativcima,
 - Nakon svake aktivnosti reprezentacije, ukoliko je boravio sa istom, podnosi izvještaj o radu i rezultatima,
 - Obavlja i druge poslove vezano za reprezentaciju, u skladu sa aktima Saveza.

Član 14.

Za svoj rad Sportski direktor je odgovoran UO Saveza.

Član 15.

Rad reprezentacije finansira se iz prikupljenih sredstava koje obezbjeđuje UO od državnih, entitetskih i kantonalnih institucija, sponzorstva, donacija, prodatih ulaznica sa takmičenja, revijalnih predstava i drugih izvora finansiranja.

Utroškom ovako prikupljenih sredstava rukovodi UO Saveza.

Član 16.

Iz sredstava prikupljenih za reprezentacije podmiruju se svi troškovi, a naročito troškovi putovanja i boravka na takmičenjima, priprema, nabavke sportske opreme i dr.

Član 17.

Selektor-trener i Sportski direktor, na svoj zahtjev za razrješenje ili ostavkom, mogu biti razriješeni i prije isteka roka na koji su imenovani. Također, oni mogu biti smijenjeni i razriješeni na zahtjev člana Saveza (entitetski savez) ili Upravnog odbora. Zahtjevi za smjenjivanje ili razrješenje ili ostavka moraju biti pismeno obrazloženi i dokumentovani.

Uz podnošenje zahtjeva za razrješenje ili uz ostavku, selektor-trener, odnosno Sportski direktor, dužni su dostaviti i izvještaj o svom radu do trenutka podnošenja zahtjeva ili ostavke.

Selektor-trener, odnosno Sportski direktor, moraju biti pozvani na sjednicu UO odbora na kojoj se razmatra zahtjev za njihovo smjenjivanje ili razrješenje ili podnijeta ostavka.

Upravni odbor cijeni opravdanost razloga za smjenjivanje ili razrješenje ili za ostavkom i donosi odluku. Odluka UO može biti da prihvati navedene zahtjeve ili ostavke ili da ih odbije.

Član 18.

Ukoliko UO Saveza odlučiti da prihvati zahtjev za razrješenje ili za ostavku, on može dati selektoru-treneru, odnosno Sportskom direktoru prijedlog da obavlja istu funkciju još tri mjeseca, u kom periodu bi UO mogao završiti postupak imenovanja novih lica ili da prihvati zahtjeve ili ostavke i odmah imenuje vršioce dužnosti, uz odluku o raspisivanju konkursa za imenovanje novih lica.

Ukoliko selektor-trener, odnosno Sportski direktor, prihvate prvu opciju, pripadaju im sve prinadležnosti iz njihovog dotadašnjeg statusa, shodno vremenu angažovanja nakon prihvatanja prijedloga UO.

Član 19.

UO Saveza može posebnim odlukama potpunije regulisati neka od pitanja koja su regulisana ovim Pravilnikom, s tim što te odluke ne mogu imati retroaktivno važenje.

Donošenjem ovakvih odluka smatra se da su izvršene izmjene i dopune Pravilnika.

Za sve što nije definisano ovim Pravilnikom primjenjuju se normativna akta Saveza ili se definiše novim odlukama UO.

Član 20.

Izmjene i dopune ovoga Pravilnika vrše se na način i po postupku za njegovo donošenje.

Član 21.

Tumačenje ovog Pravilnika vrši UO Saveza.

Član 22.

Ovaj Pravilnik stupa na snagu osmog dana od dana usvajanja na sjednici UO Saveza.

Broj: UO-13-02/21

Sarajevo, 24.03.2021. godine

PREDSJEDNIK KS BiH

Miroljub Kremenović



Miroljub Kremenović